

七十二家集

梁武帝御製集卷之十

梁高祖武皇帝蕭衍著

書

喻袁昂手書

夫禍福無門興亡有數天之所棄人孰能匡機  
來不再圖之宜早頃藉聽道路承欲狼顧一隅  
旣未悉雅懷聊申往意獨夫狂悖振古未聞窮  
凶極虐歲月滋甚天未絕齊聖明啓運兆民有  
賴百姓來蘇吾荷任前驅掃除京邑方撥亂反

正伐罪吊民至止以來前無橫陣今皇威四臨  
長圍已合遐邇畢集人神同奮銳卒萬計鐵馬  
千群以此攻戰何往不克况建業孤城人懷離  
阻面縛軍門日夕相繼屠潰之期勢不云遠兼  
熒惑出端門太白入氏室天文表於上人事符  
於下不謀同契寔在茲辰且范岫申胥久薦誠  
款各率所出仍爲犄角沈法瑀孫臏朱端已先  
肅清吳會而足下欲以區區之郡禦堂堂之師  
根本旣傾枝葉安附童兒牧豎咸謂其非求之

明鑒寔所未達今竭力昏主未足爲忠家門屠  
滅非所謂孝忠孝俱盡將欲何依豈若翻然改  
圖自招多福進則遠害全身退則長守祿位去  
就之宜幸加詳擇若執迷遂往同惡不悛大軍  
一臨誅及三族雖貽後悔寧復云補欲布所懷  
故致今白

袁昂答書附

都史至辱誨承藉以衆論謂僕有勤王之舉  
兼蒙誚責獨無送款循復嚴旨若臨萬仞三

吳內地非用兵之所況以偏隅一郡何能爲  
役近奉勅以此境多虞見使安慰自承麾旆  
屈止莫不膝袒軍門惟僕一人敢後至者政  
以內揆庸素文武無施直是陳國賤男子耳  
雖欲獻心不增大師之勇置其愚默寧沮衆  
軍之威幸藉將軍含弘之大可得從容以禮  
竊以一食微施尙復投殞況食人之祿而頓  
忘一旦非惟物議不可亦恐明公鄙之所以  
躊躇未遑薦璧遂以輕微爰降重命震灼於

心忘其所厝誠推理鑒猶懼威臨

袁昂入梁後謝武帝啓附

恩隆絕望之辰慶集寒心之日燭灰非喻黃  
枯未擬樞衣聚足顛隕不勝臣遍歷三墳備  
詳六典巡校賞罰之科調檢生死之律莫不  
嚴五辟於明君之朝峻三章於聖人之世是  
以塗山始會致防風之誅鄴邑方構有崇侯  
之伐未有緩憲於斯戮之人賒刑於耐罪之  
族出萬死入一生如臣者也推恩及罪在臣

寔大披心瀝血敢乞言之臣東國賤人學行  
何取旣殊鳴鴈直木故無結綬彈冠徒藉羽  
儀易農就仕往年濫職守秩東隅仰屬龔行  
風驅電掩當其時也負鼎圖者日至執玉帛  
者相望獨在愚臣頃昏大義殉鴻毛之輕忘  
同德之重但三吳險薄五湖交通屢起田儼  
之變每懼殷通之禍空慕君魚保境遂失師  
涓枹噐後至者斬臣甘斯戮明刑殉袞誰曰  
不然幸約法之弘承解網之宥猶當降等薪

粲遂乃頓釋鉗赭歛骨吹魂還編黔庶濯疵  
蕩穢入楚游陳天波旣洗雲汨邊沐古人有  
言非死之難臣之所荷曠古不書臣之所死  
未知何地



與蕭寶寅書

寶寅本齊建安郡王高祖克建業殺其兄弟寶寅潛逃入魏封齊王高祖遣康絢於浮山堰淮以灌揚涂魏除寶寅爲鎮東將軍拒之高祖手書與寶寅寶寅表送其書陳忿毒之意魏朝爲之報答

謝齊建安王寶寅亡兄長沙宣武王昔投漢中值壯寇華陽地絕一隅內無素畜外絕繼援守危眈勒計踰田單卒能全土破敵以弱爲強使至之日君臣動色左右相賀齊明帝每念此功未嘗不輟箸咨嗟及至張永崔慧景事大將覆

軍於外小將懷貳於內事危累卵勢過綴旒亡  
兄忠勇奮發旋師大岨重圍累日一鼓魚潰克  
定慧景功踰桓文亡弟衛尉兄弟戮力盡心內  
外大勲不報翻罹荼酷百口幽執禍害相尋朕  
於齊明帝外有龔敵之力內盡帷幄之誠日自  
三省曾無寸咎遠身邊外亦復不免遂遣劉山  
陽輕舟西上來見掩襲時危事迫勢不得已所  
以誓衆樊鄧會踰孟津本欲翦除梅蟲兒茹法  
珍等以雪冤酷拔濟親屬反身素里屬張稷王

珍國已建大事實。嗟子晉屢動危機。迫樂推之心。應上天之命。事不獲已。豈其始願。所以自有天下。絕棄房室。斷除滋味。正欲使四海見其本心耳。勿謂今日之位是爲可重。朕之視此。曾不如一芥。雖復崆峒之蹤。難追汾陽之志。何遠而今立此堰。卿當未達本意。朕於是蟲猶不欲殺。亦何急爭無用之地。戰蒼生之命也。正爲李繼伯在壽陽。侵犯邊境。歲月滋甚。或攻小城小戍。或掠一村一里。若小相訓答。終無寧日。邊邑爭

桑吳楚連禍所以每抑鎮戍不與較計繼伯旣  
得如此濫竊彌多今脩此堰止欲以報繼伯侵  
盜之役旣非大舉所以不復文移址土卿幼有  
倜儻之心早懷縱橫之氣往日卿於石頭舉事  
雖不克捷亦丈夫也今止河洛真其時矣雖然  
爲卿計者莫若行率此袞襲據彭城別當遣軍  
以相影援得捷之後便遣卿兄子屏侍送卿國  
廟并卿室家及諸姪從若方欲還址更設奇計  
恐機事一差難重復集勿爲韓信受困野雞

答蕭穎胄書

高祖將起義師東昏以劉山陽爲巴陵太守使就蕭穎胄以襲襄陽及至巴陵高祖遣王天獸賁書與穎胄以疑山陽山陽果疑不上穎胄乃斬天獸山陽信之將數十人馳入穎胄伏甲斬之送首高祖仍以南康王尊號之議來告且曰時月未利當須來年遽便進兵恐非廟算高祖答之發襄陽穎胄領兵會于軍

今坐甲十萬糧用自竭況所藉義心一時驍銳事事相接猶恐疑怠若頓兵十旬必生悔吝童兒立異便大事不成今太白出西方杖義而動天時人謀有何不利處分已定安可中息昔武

王伐紂行逆太歲復須待年月乎

與何胤書

想恒清豫縱情林壑致足懽也旣內繼心戰外  
勞物役以道養和履候無爽若邪擅美東區山  
川相屬前世嘉賞是爲樂土僕推遷薄宦自東  
徂西晤言素對用成睽闕傾首東顧曷日無懷  
疇昔懽遇曳裾儒肆寔欲卧遊千載畋漁百氏  
一行爲吏此事遂乖屬以世道威夷仍離屯故  
投袂數千剋黜豐禍思得矚卷諮款寓情古昔  
夫豈不懷事與願謝君清襟素託栖寄不遠中

居人世始同隱淪既俯捨青組又脫綈朱轡但  
理存用捨義貴隨時往識禍萌寔爲先覺超然  
獨善有識欽嗟今者爲邦貧賤咸恥好仁由已  
幸無凝滯比別具白此未盡言今遣候承育息  
矯首還翰慰其引領



答陶弘景論書書一

近二卷欲少留差不爲異紙卷是出裝書既須  
見前所以付耳無正可取備於此及欲更須細  
書如論箴例逸少書無甚極細書樂毅論乃微  
麗健恐非真蹟太師箴小復方媚筆力過嫩書  
體乖異二者已經至鑒此外便無可付也

陶弘景與武帝論書啓附

奉青左右中書復稍有能者惟周喜贊夫以  
含心之芟實伺夾鍾吐氣今旣自上體妙爲

下理用成工每惟申鍾王論於天下進藝方  
典所張臣沉朽不能鑽仰高深自懷歎慕前  
奉神筆三紙并今爲五非但字字注目乃畫  
畫拙心目覺適媚轉不可說以酬昔歲不復  
相類正此卽爲楷何復多尋鍾王臣心本自  
敬重今者竊增愛服俯仰悅豫不能自已  
適伏蒙 給二卷伏覽標帖皆如聖旨旣不  
顯垂允少畱不能久停已就摹者一段未畢  
不赴今信紙卷先已經有兼多他雜無所復

取亦請俟俱了日奉送兼此諸書是篇章體  
臣今不辦復得脩習惟願細書如樂毅論太  
師箴例依倣以寫經傳永存冥顯申精要而  
已

答陶弘景論書書二

又省別疏云故當宜微以著賞此既勝事雖風  
訓非嫌非嫌然非所習聊試略言夫運筆邪則  
無芒角執手寬則書緩弱點掣短則法臃腫點  
擎長則法離漸畫促則字橫畫疎則字形慢拘  
則乏勢放又少則純骨無媚純肉無力少墨深  
澁多墨笨鈍比並皆然任意所之自然之理也  
若抑揚得所趣舍無違隨筆廉斷觸勢峰鬱揚  
波折節中規合矩分間下注濃纖有方肥瘦相

和骨力相稱婉婉曖曖視之不足稜稜凜凜常有生氣適眼合心便爲甲科衆家可識亦當復貫串耳六義可工亦當復由習耳一聞能持一見能記且古且今不無其人大抵爲論終歸是習程邈所以能變書體爲之舊也張芝所以能善書工學之積也旣舊且積方可以肆其談吾少來乃至不能嘗畫甲子無論於篇紙老而言之亦復何謂正足見嗤於當今貽笑於後代遂有獨冠之言覽之背熱隱真於是乎累真矣此

直一藝之精非吾所謂勝事此道心之塵非吾所謂無欲也

陶弘景與武帝啓附

樂毅論愚心近甚疑是摹而不敢輕言今肯以爲非真竊自信頗涉有悟箴咏吟賛過爲淪弱許靖素段遂蒙永給仰銘衿獎益無以喻如此書雖不在法例而致用理均背閒細楷兼復兩玩先於都遇得飛白一卷云是逸少好跡臣不嘗別見無以能辨惟覺勢力驚

絕謹以上呈於臣非用脫可克閣願仍以奉  
上臣昔於馬澄處見逸少正書目錄一卷澄  
云右軍勸進洛神賦諸書十餘首皆作今體  
惟急就章一篇古法緊細近脫憶此語當是  
零落已不復存澄又云帖注出裝者皆擬賚  
諸王及朝士臣近見三卷首帖亦謂久已分  
本不敢議此正復希於三卷中一二條更得  
預出裝之例耳天旨遂復頓給先卷下情益  
用悚息近初見卷題云第二十三四已欣其

多今者賜書卷第遂至二百七十惋訝無已  
天府如海非一鉅所汲良用息心前後都已  
蒙見大小五卷於野拙之分寔以告幸若非  
殊恩豈可觖望愚固本博涉而不能精昔患  
無書可看乃願作主書令史晚愛隸法又羨  
典掌之人嘗言人生數紀之內識解不能周  
流天壤區區惟充恣五欲寔可媿耻每以爲  
得作才鬼亦當勝於頑仙至今猶然使欲翻  
之自無射以後國政方殷山心歉默不敢復



以虛閒塵觸謹於此題事遂成煩黷伏願聖

慈照錄誠懃

答陶弘景論書書三

省區別諸書良有精賞異同所未可知悉可否  
耳給事黃門二紙爲任靖書觀所送靖書諸字  
相附近彼二紙靖書體解雜便當非靖書復當  
以點畫波擊論極諸家之致此亦非可倉卒運  
於毫楮且保拙守中也許任二跡并摹者並付  
反

陶弘景與武帝啓附

第一卷中有雜跡謹疏注如別恐未允愚衷

并竊所摹者亦以上呈近十餘日精慮悚悸  
無寧涉事遂至淹替不宜復待填畢餘條並  
非用唯叔夜威輦二篇是經書體式追以單  
郭爲恨伏按卷上第數甚爲不少前旨惟有  
四卷此似是宋元嘉中撰集當由自後多致  
散失逸少有名之迹不過數首黃庭勸進像  
贊洛神此等不甞猶得存者

答陶弘景論書書四

鍾書乃有一卷傳以爲真意謂悉是摹學多不足論有兩三行許似摹微得鍾體逸少學鍾的可知近有二十許首此外字細畫短多是鍾法今欲令人帖裝未便得付來月有竟者當遣送也

陶弘景與武帝啓附

伏覽書前意雖止二六而規矩必周後書不出二百亦褒貶大備一言以蔽便書情頓極

使元常老骨更蒙榮造子敬懦肌不沉泉夜  
唯逸少得進退其間則玉科顯然可觀若非  
聖證品析恐愛附近習之風永遂淪迷矣伯  
英旣稱草聖元常亦自隸絕論旨所謂殆同  
璿璣神寶曠世莫繼斯理旣明諸畫虎之徒  
當日就輟筆反古歸真方弘盛世愚管見預  
聞嘉佩無肩比世皆尚子敬子敬元常繼以  
齊代名寔脫略海內非惟不復知有元常於  
逸少亦然非排棄所可黜涅而不淄不過數

族今奉此論自舞自蹈未足逞泄願以所摹  
竊示洪遠思曠此二人皆是均思者必當贊  
仰踴躍有盈半之益臣與洪遠雖不相識從  
子翊以學往來因之有會但旣在閣恐或已  
應聞知摹者所裝字大小不堪均調熟看乃  
尚可恐筆意大殊此篇方傳千載故宜令跡  
隨名偕老益增美所奉三紙伏循字跡大覺  
勁密竊恐旣以言發意意則應言而心隨意  
運手與筆會故益得諧稱下情歡仰寶奉愈

至世論咸云江東無復鍾跡常以歎息皆竚望中原廓清太丘之碑可就摹採今論旨云真跡雖少可得而推是猶有存者不審可復幾字旣無出見理冒願得工人摹填數行脫蒙見賜寔爲過幸又逸少學鍾勢巧形容勝於自運不審此例復有幾紙來肯以黃庭像贊等諸文可更有出給理自運之迹今不復希請學鍾妙仰惟殊恩

又陶弘景啓附

逸少自吳興以前諸書猶未稱凡厥好迹皆  
是向會稽時永和十許年中者從失郡告靈  
不仕以後略不復自書皆使此一人世中不  
能別見其緩異呼爲末年書逸少亡後子敬  
年十七八全放此人書故遂成與之相似今  
聖旨標顯足使衆識頓悟於逸少無末年之  
譏阮研近聞有一人學研書遂不復可別臣  
比郭摹所得雖麓寫字形而無復其用筆跡  
勢不審前後諸卷一兩條謹密者可得在出



裝之側復蒙垂給至年末間否此澤自天直  
以啓審非敢必覲

答陶隱居書

知欲徙卜想諮請幽勝謀及著龜但遷徙之日  
爲當使人爲當使鬼猶躡躑國地其不滅也

與始興王憺書

蕭子雲書筆力勁駿心手相應巧踰杜度美過  
崔寔當與元常並驅爭先

報侯景書三首

大夫出境尚有所專況始創奇謀將建大業理  
須適事而行隨方以應卿誠心有本何假詞費

又

朕與公大義已定豈有成而相納敗而相棄乎  
今高氏有使求和朕亦更思偃武進退之宜國  
有常制公但清靜自居無勞慮也

又

朕爲萬乘之主豈可失信於一物想公深得此

心不勞復有啓也

脚氣帖

數朝脚氣轉動不得多有憂懸情也二謝處委  
曲復當有情故舊數有書問不可復有興也知  
何時再言話報之

曹鄴州帖

衆軍行人最今封如別曹鄴州近遣樊士真領  
三百人猶在漁湖其應用行合應有四千人故  
指白

梁武帝御製集卷之十一

梁高祖武皇帝蕭衍著

序

爲亮法師製涅槃經疏序

曰非言無以寄言言卽無言之累累言則可以  
息言言息則諸見競起所以如來乘本願以託  
生現慈力以應化離文字以設教忘心相以通  
道欲使珉玉異價涇渭分流制六師而正四倒  
反八邪而歸一味折世智之角杜異人之口導



求珠之心開觀象之目救燒灼於火宅振沈溺  
於浪海故法雨降而焦種更榮慧日升而長夜  
蒙曉發迦葉之排憤吐真寔之誠言雖復二施  
等於前五大陳於後三十四問參差異辯方便  
勸引各隨意答舉要論經不出兩塗佛性開其  
本有之源涅槃明其歸極之宗非因非果不起  
不作義高萬善事絕百非空空不能測其真際  
玄玄不能窮其妙門自非德均平等心答無生  
金牆玉室豈易入哉

記

立神明成佛義記

沈續序并註

夫神道冥默宣尼固已絕言心數理妙柱史  
又所未說非聖智不周近情難用語遠故也  
是以先代玄儒談遺宿業後世通辯亦淪滯  
來身非夫天下之極慮何得而詳焉故惑者  
聞識神不斷而全謂之常聞心念不常而全  
謂之斷云斷則迷其性常云常則惑其用斷  
因用疑本謂在本可滅因本疑用謂在用弗

移莫能精求互起偏執乃使天然覺性自沒  
浮談聖王稟以玄符御茲大寶覺先天垂則  
觀民設化將恐支離詭辯構義橫流徵敘繁  
絲伊誰能振釋教遺文其將喪矣是以著斯  
雅論以弘至典績早念身空栖心內教每餐  
法音用忘寢疾而闇情難曉觸理多疑至於  
佛性大義頓迷心路旣天誥遠流預同撫覲  
萬夜獲開千昏永曙分除之疑朗然俱徹竊  
惟事與理亨無物不識用隨道合奚心不釋

故行雲徘徊猶感美音之和游魚踴躍尙賞  
清絲之韻况以入神之妙發自天衷此臣所  
以舞之蹈之而不能自已者也敢以膚受謹  
爲注釋豈伊錐管用窮天奧庶幾固惑所以  
釋焉

夫涉行本乎立信

臣績曰夫愚心闇識必發大

自脩脩必由信信者憑師仗理無違之心也故

五恨以一行爲本四信以不違爲宗宗信既立

萬善自行行善

信立由乎正解

臣績曰夫邪正

造果謂之行也

不辨將何取信

故立信之本

解正則外邪莫擾

臣績曰信一心

資乎正解

者則萬邪滅矣

是知內懷正見信立則內識無疑臣績曰識者則外邪莫動也

論云心意識體一面異然信解所依其宗有在名心既信矣將何疑乎

臣績曰依者憑也夫安心有本則何者源神明枝行自從有本之古顯乎王句也

以不斷為精精神必歸妙果臣績曰神而有盡寧謂神乎故經云

吾見灰者形壞體化而神不滅隨行善惡禍福自追此即不滅斷之義也若化同草木則豈曰

精乎以其不斷故終歸妙極憑心此地則觸理皆明明於衆理何行不成信解之宗此之謂也

妙果體極常住精神不免無常臣績曰妙果明理已足所以體

唯極常精神涉行未無常者前滅後生刹那不滿故之不免遷變

住者也臣績曰刹那是天竺國音迅速之極名也生而即滅寧有住乎故淨名歎曰比

住者也

丘卽時生老滅矣若心用心於攀緣前識必異後者斯

則與境俱往誰成佛乎臣績曰夫心隨境動是其外用後雖續前終非

定論故知神識之性湛然經云心爲正因終成

佛果臣績曰畧語佛因其義有二一曰緣因二

善有取發之功故曰緣因神識是其正本故曰正又

言若無明轉則變成明案此經意理如可求何

者夫心爲用本本一而用殊殊用自有興廢一

本之性不移臣績曰陶冰塵穢本識則明明闇

謂之一本者卽無明神明也臣績曰神明本暗尋

卽故以無明爲因尋

無明之稱非太虛之目土石無情豈無明之謂

臣績曰夫別了善惡匪心不知明審是非匪情

莫識太虛無情故不明愚智土石無心豈辨解

惑故知解惑存乎有心愚智在故知識慮應明

乎有識既謂無明則義在心矣

體不免惑惑慮不知故曰無明臣績曰明爲本性所以應明識

染外塵故內不免惑惑而不了乃而無明體上

謂無明因斯致稱豈肯空也哉

有生有滅生滅是其異用無明心義不改臣績曰既

有其體便有其用語用非體論體

非用用有興廢體無生滅者也

將恐見其用

異便謂心隨境滅臣績曰惑者迷其體用故不

能精何者夫體之與用不離

不卽離體無用故云不離用義非體故云不卽

見其不離而迷其不卽迷其不卽便謂心隨境

故經無明名下加以住地之目此顯無明卽

是神明明性不遷也

臣績曰無明係以住地蓋是斥其迷體而抱惑

之義未

何以知然如前心作無間重惡後識起

非想妙善善惡之理大懸而前後相去甚迥斯

用果無一本安得如此相續

臣績曰不有一本則用無所依而惑

者見其類續爲一故舉大善斥相續之迷

是知前惡自滅惑識不移

後善雖生暗心莫改

臣績曰未嘗以善惡生滅虧其本也

故經言

若與煩惱諸結俱者名爲無明若與一切善法

俱者名之爲明豈非心識性一隨緣異乎

臣績曰若



善惡互起豈謂俱乎而恒對其言而故知生滅

常迷其旨故舉此要文以曉群惑

遷變酬於往因善惡交謝生乎現境臣續曰生滅由於本

業非現境使之然善惡生而心爲其本未曾異

矣臣續曰雖復用由以其用本不斷故成佛之

理皎然隨境遷謝故生死可盡明矣臣續曰成佛皎然狀

其本也生死可盡由其用也若用而無本

則滅而不成若本而無用則成無所滅矣

輿駕東行記

有覆船山酒壘山南次高驪山傳云昔有高驪  
國女來東海神乘船致酒禮聘之女不肯海神  
撥船覆酒流入曲阿故曲阿酒美也

連珠

連珠三首

蓋聞水鏡不以妍媸殊照芝蘭寧爲貴賤異芳  
是以弘道歸於蕪濟至德由乎兩忘

蓋聞一青不足以掩德五刑非可以妄加是以  
徑寸之珠有時而類盈尺之寶不能無瑕

蓋聞理有漸萌豈須拔奇之力物有易傷不待  
凌雲之繳是以微照積而出飄虛弦動而隼落

賜到漑連珠一首

研磨墨以騰文筆飛毫以書信如飛蛾之赴火  
豈焚身之可吝必~~老~~年其已及可假之於少盡

箴

凡百箴

凡百衆庶爾其聽之事之大小先當熟思思之  
不熟致成反覆其心不定不可施令是曰亂常  
是曰敗政弗正一作止厥身亦喪厥命惟慈惟恕  
惟孝惟敬嚴惟率下直惟厥正如彼互鄉如彼  
暴虎家聲不建有忝爾祖思之既熟決意而行  
臨難必勇見義忘生門有賢良家有忠貞勿恃  
爾尊驕慢淫昏勿謂爾貴長夜荒醉日不恒中

月盈則虧崇山落峰高樹折枝履邪念正居安  
思危莫言爾賤而不受命君子小人本無定性  
勿謂人微而以自輕張他疑爲卒李衡爲兵忠  
信孝友皆以揚名有黃叔度父牛醫者聲高海  
內名重天下伊尹負鼎太公屠肉寧戚飯牛傳  
說版築皆王霸師世受爵祿誠爾凡百勿戾勿  
昏人無貴賤道在則尊余重告爾莫自抑卑疑  
克家棟梁唯斯爲吉水清照淨表直影端近取  
諸身無假遠觀猗與哲人勿謂斯難

銘

硯銘

背模德篇

假鑿圖心

文

卽位告天文

皇帝臣諱敢用玄牡昭告於皇天后帝齊氏以  
曆運斯旣否終則亨欽若天應以命于諱夫任  
是司牧惟能是受天命不干常帝王非一族唐  
謝虞受漢替魏升爰及晉宋憲章在昔咸以君  
德馭四海元功子萬姓故能大庇民黎光宅區  
宇齊代云季世主昏凶狡爲群慝是崇是長肆  
厥姦回暴亂以撻虐于我有邦禪溥天惴惴將



墜於深壑九服八荒之內連率岳牧之君蹶角  
頓顙匡救無術卧薪待然援天靡訴諱投袂星  
言椎鋒萬里厲其掛冠之情用拯兆民之切銜  
膽誓衆覆銳屠堅建立人主克翦昏亂遂因時  
來宰司邦國濟民康世寔有厥勞而晷緯呈祥  
川岳劾祉朝夕垺牧日月郊畿代終之符旣顯  
革運之期已萃殊俗百蠻重譯獻款人神遠邇  
罔不和會於是辟公卿士咸致厥誠並以皇乾  
降命難以謙拒齊帝脫屣萬邦授以神器諱自

惟匪德辭不獲許仰追上玄之睠俯惟億兆之  
心宸極不可久曠民神不可乏主遂藉樂推膺  
此嘉祚以茲寡薄臨御萬方顧求夙志永言祇  
惕敬簡元辰恭茲大禮升壇受禪告類上帝克  
播休祉以弘盛烈式傳厥後用永保于我有梁  
惟明靈是饗

捨道歸佛文

維天監三年四月八日梁國皇帝蘭陵蕭衍稽  
首和南十方諸佛十方尊法十方聖僧伏見經  
云發菩提心者卽是佛心其餘諸善不得爲喻  
能使衆生出三界之苦門入無爲之勝路故如  
來漏盡智凝成覺至道通機德圓取聖登慧炬  
以照迷鏡法流以澄垢啓瑞迹於天中爍靈儀  
於象外度群迷於愆海引含識於涅槃登常樂  
之高山出愛河之深際言垂四句語絕百非應

迹娑婆示生淨飯王宮誕相步三界而爲尊道  
樹成光普大千而流照但以機心淺薄好生厭  
怠自期二月當至雙林遂乃湛說圓常且復潛  
輝鶴樹闍王滅罪婆薮除殃若不逢值大聖法  
王誰能救接在迹雖隱其道無虧弟子經遲迷  
荒耽事老子歷葉相承染此邪法習因善發棄  
迷知返今捨舊醫歸憑正覺願使未來世中童  
男出家廣弘經教化度含識同共成佛寧在正  
法之中長淪惡道不樂依老子教暫得生天涉

大乘心離二乘念正願諸佛證明菩薩弟子蕭  
衍和南

邵陵王綸上武帝捨事道法啓附

臣綸聞如來嚴相巍巍架于有頂微妙色身  
蕩蕩顯于無際假金輪而啓物託銀粟以應  
凡揮波若之利刀收涅槃之妙果泯生死之  
苦海濟常樂於彼岸故能降慈悲雲垂甘露  
雨七處八會教化之義不窮四諦五時利益  
之方無盡並冰清日盛霧豁雲除燭火翳光

塵熱自靜可謂入俗化於蒙底出冥導此真  
如使稠林邪逕之人景法門而無倦渴愛聾  
瞽之士慕探賸而知迴道樹始於迦維德音  
盛于京洛恒星不見周鑒娠徵滿月圓姿漢  
感宵夢五法用傳萬德方兆華俗潛改競扇  
高風資此三明照迷途之失憑茲七覺拔長  
夜之苦屬值皇帝菩薩應天御物負宸臨民  
含光宇宙照清海表垂無礙辯以接黎庶以  
本願力攝受衆生故能隨方逗藥開示權因

顯崇一乘之旨用廣十地之基是以萬邦廻  
向俱稟正識幽顯靈祇皆蒙誘濟人興等覺  
之願物起菩提之心莫不翹勤歸宗之境悅  
懌還源之趣共保慈悲俱脩忍辱所謂覆護  
饒益橋梁津濟者矣道旣光被民亦化之於  
是應真飛錫騰虛接影破邪外道堅持正法  
伽藍精舍寶刹相望講會傳經德音盈耳臣  
昔未達理源稟承外道如欲植甘果翻種苦  
栽欲除渴乏反趣鹹水今啓迷方粗知歸向

受菩薩大戒戒節身心捨老子之邪風入法  
流之真教伏惟天慈曲垂矜許謹啓



金剛般若懺文

菩薩戒弟子皇帝稽首和南十方諸佛無量尊  
法一切賢聖如來以四十年中所說般若本末  
次第略有五時大品小品枝條分散仁王天王  
宗源派別金剛道行隨義制名須真法才以人  
標題雖復前說後說應現不同至理至言其歸  
一揆莫非無相妙法悉是智慧深經以有取之  
既爲殊失就無求也彌見深乖義異去來道非  
內外遣之又遣之不能得其真空之以空之未

足明其妙真俗同棄本迹俱冥得之於心然後  
爲法是以無言童子妙得不言之妙不說菩薩  
深見無說之深弟子習學空無脩行智慧早窮  
尊道克已行法方欲以家刑國自近及遠一念  
之善千里斯應一心之力萬國皆歡恒沙衆生  
皆爲法侶微塵世界悉是道場今謹於某處建  
如千僧如千日金剛般若懺現前大衆至心敬  
禮釋迦牟尼佛金剛般若禮長老須菩提願諸  
佛菩薩以般若因緣同時集會哀憐萬品護念

群生引入慧流同歸佛海得金剛之妙寶見金  
牒之深經頂戴奉持終不捨離逮得已利盡諸  
有結心行自在無復塵勞稽首敬禮常住三寶

摩訶般若懺文

菩薩戒弟子皇帝稽首和南十方諸佛及無量  
尊法一切賢聖觀夫常樂我淨蓋真常之妙本  
無常苦空乃世相之累法而苦樂殊見分別之  
路興真俗異名計著之情反顛倒我人之所彌  
見愚癡取舍有無之間轉成專附豈知妙道無  
相至理絕言寔法唯一真如不二諸佛以慈悲  
之力開方便之門教之以遣蕩示之以冥滅百  
非俱棄四句皆亡然後無復塵勞解脫清淨但

般若之說唯有五時而智慧之旨終歸一趣莫  
非第一義諦悉是無上法門弟子頗學空無深  
知虛假王領四海不以萬乘爲尊攝受兆民彌  
覺萬幾成累每時丕顯嗟三有之洞然終日乾  
乾歎四生之俱溺常願以智慧燈照朗世間般  
若舟航濟渡凡識今謹於某處建如千僧如千  
日大品懺現前大衆至心敬禮慧命須菩提願  
諸衆生離染著相廻向法喜安住禪悅同到香  
城興見寶臺般若識諸法之無相見自性之恒

空無生法忍自然具足稽首敬禮常住三寶

梁武帝御製集卷之十二

梁高祖武皇帝蕭衍著

文

斷酒肉文

弟子蕭衍敬白諸大德僧尼諸義學僧尼諸寺  
三官夫匡正佛法是黑衣人事廼非弟子白衣  
所急但經教亦云佛法寄囑人王是以弟子不  
得無言今日諸僧尼開意聽受勿生疑閉內懷  
忿異凡出家人所以異於外道者正以信因信

果信經所明信是佛說經言行十惡者受於惡  
報行十善者受於善報此是經教大意如是若  
出家人猶嗜飲酒噉食魚肉是則爲行同於外  
道而復不及何謂同於外道外道執斷常見無  
因無果無施無報今佛弟子酣酒嗜肉不畏罪  
因不畏苦果卽是不信因不信果與無施無報  
者復何以異此事與外道見同而有不及外道  
是何外道各信其師師所言是弟子言是師所  
言非弟子言非涅槃經言迦葉我今日制諸弟



子不得食一切肉而今出家人猶自噉肉戒律  
言飲酒犯波夜提猶自飲酒無所疑難此事違  
於師教一不及外道又外道雖復邪僻持牛狗  
戒旣受戒已後必不犯今出家人旣受戒已輕  
於毀犯是二不及外道又外道雖復五熱炙身  
投淵赴火窮諸苦行未必皆噉食眾生今出家  
人噉食魚肉是三不及外道又外道行其異學  
雖不當理各習師法無有覆藏今出家人噉食  
魚肉於所親者乃自和光於所疎者則有隱避

如是爲行四不及外道又外道各宗所執各重其法乃自高聲大唱云不如我道真於諸異人無所忌憚今出家人或復年時已長或復素爲物宗噉食魚肉極自艱難或避弟子或避同學或避白衣或避寺官懷挾邪志崎嶇覆藏然後方得一過噉食如此爲行五不及外道又復外道直情逕行能長已徒衆惡不能長異部惡今出家人噉食魚肉或爲白衣弟子之所聞見內無慚愧方飾邪說云佛教爲法本存遠因在於

卽目未肯悉斷以錢買肉非已自殺此亦非嫌  
白衣愚癡聞是僧說謂真實語便復信受自行  
不善增廣諸惡是則六不及外道又外道雖復  
非法說法法說非法各信經書死不違背今出  
家人噉食魚肉或云肉非已殺猶得自噉以錢  
買肉亦復非嫌如是說者是事不然涅槃經云  
一切肉悉斷及自死者自死者猶斷何況不自  
死者楞伽經云爲利殺衆生以財網諸肉二業  
俱不善死墮呌呼獄何謂以財網肉陸設置罟

水設網罟此是以網網肉若於屠殺人間以錢  
買肉此是以財網肉若令此人不以財網肉者  
習惡律儀捕害衆生此人爲當專自供口亦復  
別有所擬若別有所擬向食肉者豈無殺分何  
得云我不殺生此是灼然違背經文是七不及  
外道又復外道同其法者和合異其法者苦治  
令行禁止莫不率從今出家人或爲師長或爲  
寺官自開酒禁噉食魚肉不復能得施其教戒  
裁欲發言他卽譏刺云師向亦爾寺官亦爾心

懷內熱默然低頭面赤汗出不復得言身既有  
瑕不能伏物便復摩何直爾止住所以在寺者  
乖違受道者放逸此是八不及外道又外道受  
人施與如已法受鳥戒人受鳥戒施受鹿戒人  
受鹿戒施鳥戒人終不覆戒受鹿戒施鹿戒人  
終不覆戒受鳥戒施今出家人云我能精進我  
能苦行一時覆相誑諸白衣出卽飲酒開般惡  
門入卽噉肉集衆苦本此是九不及外道又外  
道雖復顛倒無如是衆事酒者是何臭氣水穀

失其正性成此別氣衆生以罪業因緣故受此  
惡觸此非正直道法亦非甘露上味云何出家  
僧尼猶生耽嗜僧尼授白衣五戒令不飲酒令  
不妄語云何翻自飲酒違負約誓七衆戒八戒  
齋五篇七聚長短律儀於何科中而出此文其  
餘衆僧故復可至學律者彌不宜爾且開放  
逸門集衆惡本若白衣人其此在藥出家人猶  
當訶止云某甲汝就我受五戒不應如是若非  
受戒者亦應云檀越酒是惡本酒是魔事檀越

今日幸可不飲云何出家人而應自飲尼羅浮  
陀地獄身如段肉無有識知此是何人皆飲酒  
者出家僧尼豈可不深信經教自棄正法行於  
邪道長養惡根造地獄苦習行如此豈不內愧  
猶服如來衣受人信施居處塔寺仰對尊像若  
飲酒食肉如是等事出家之人不及居家何故  
如是在家人雖飲酒噉肉無犯戒罪此一不及  
居家人在家人雖復飲酒噉肉各有丘窟終不  
以此仰觸尊像此是二不及居家人在家人雖

復飲酒噉肉終不吐泄寺舍此是三不及居家  
人在家人雖復飲酒噉肉無有譏嫌出家人若  
飲酒噉肉使人輕賤佛法此是四不及居家人  
在家人雖復飲酒噉肉門行井竈各安其鬼出  
家人若飲酒噉肉臭氣熏蒸一切善神皆悉遠  
離一切褻魔皆悉歡喜此是五不及居家人在  
家人雖復飲酒噉肉自破財產不破他財出家  
人飲酒噉肉自破善法破他福田是則六不及  
居家人在家人雖復飲酒噉肉皆是自力所辦



出家人若飲酒噉肉皆他信施是則七不及居  
家人在家人雖復飲酒噉肉是常業更非異事  
出家人若飲酒噉肉褻魔外道各得其便是則  
八不及居家人在家人雖復如此飲酒噉肉猶  
故不失世業大耽昏者此則不得出家人若飲  
酒噉肉若多若少皆斷佛種是則九不及居家  
人不及外道不及居家略出所以各有九事欲  
論過患條流甚多可以例推不復具言今日大  
德僧尼今日義學僧尼今日寺官宜自警戒嚴

淨徒衆若其懈怠不遵佛教猶是梁國編戶一  
民弟子今日力能治制若猶不依佛法是諸僧  
官宜依法問京師頃年講大涅槃經法輪相續  
便是不斷至於聽受動有千計今日重令法雲  
法師爲諸僧尼講四相品四中少分諸僧尼常  
聽涅槃經爲當曾聞此說爲當不聞若已曾聞  
不應違背若未曾聞今宜憶持佛經中究竟說  
斷一切肉乃至自死者亦不許食何況非自灰  
者諸僧尼出家名佛弟子云何不從師教經言

食肉者斷大慈種何謂斷大慈種凡大慈者皆  
令一切衆生同得安樂若食肉者一切衆生皆  
爲怨對同不安樂若食肉者是遠離聲聞法若  
食肉者是遠離辟支佛法若食肉者是遠離菩  
薩法若食肉者是遠離菩提道若食肉者是遠  
離佛果若食肉者是遠離大涅槃若食肉者障  
生六欲天河況涅槃果若食肉者是障四禪法  
若食肉者是障四空法若食肉者是障戒法若  
食肉者是障定法若食肉者是障慧法若食肉

者是障信根若食肉者是障進根若食肉者是障念根若食肉者是障定根若食肉者是障慧根舉要爲言障三十七道品若食肉者是障四真諦若食肉者是障十二因緣若食肉者是障六波羅蜜若食肉者是障四弘誓願若食肉者是障四攝法若食肉者是障四無量心若食肉者是障四無礙智若食肉者是障三三昧若食肉者是障八解脫若食肉者是障九次第定若食肉者是障六神通若食肉者是障百八三昧

若食肉者是障一切三昧若食肉者是障海印  
三昧若食肉者是障首楞嚴三昧若食肉者是  
障金剛三昧若食肉者是障五眼若食肉者是  
障十力若食肉者是障四無所畏若食肉者是  
障十八不共法若食肉者是障一切種智若食  
肉者是障無上菩提何以故若食肉者障菩提  
心無有菩薩法以食肉故障不能得初地以食  
肉故障不能得二地乃至障不能得十地以無  
菩薩法無菩薩法故無四無量心無四無量心

故無有大慈大悲以是因緣佛子不續所以經  
言食肉者斷大慈種諸出家人雖復不能行大  
慈大悲究竟菩薩行成就無上菩提何爲不能  
忍此臭腥脩聲聞辟支佛道鴟鴞嗜鼠螂蛆甘  
蠕以此而推何可嗜著至於豺犬野犴皆知嗜  
肉人寧有知勝諸衆生近與此等同甘臭腥豈  
直常懷殺心斷大慈種凡食肉者自是可鄙諸  
大德僧諸解義者講涅槃經何可不慙懃此句  
令聽受者心得悟解又有一種愚癡之人云我

止噉魚實不食肉亦應門示此處不殊水陸衆  
生同名爲肉諸聽講者豈可不審諦受持如說  
脩行凡食肉者如前說此皆是遠事未爲近切  
諸大德僧尼當知噉食衆生者是魔行噉食衆  
生是地獄種噉食衆生是恐怖因噉食衆生是  
斷命因噉食衆生是自燒因噉食衆生是自煮  
因噉食衆生是自炮因噉食衆生是自炙因噉  
食衆生是自割因噉食衆生是自剝因噉食衆  
生是斷頭因噉食衆生是斷手因噉食衆生是

斷是因噉食衆生是破腹因噉食衆生是破背  
因噉食衆生是刺腸因噉食衆生是碎髓因噉  
食衆生是抉目因噉食衆生是割鼻因噉食衆  
生是截耳因噉食衆生是貧窮因噉食衆生是  
下賤因噉食衆生是凍餓因噉食衆生是醜陋  
因噉食衆生是聾因噉食衆生是盲因噉食衆  
生是瘖因噉食衆生是癱因噉食衆生是跛因  
噉食衆生是蹇因噉食衆生是瘡因噉食衆生  
是瘍因噉食衆生是疥因噉食衆生是癬因噉



食生是癰因噉食衆生是癰因噉食衆生是  
痛因噉食衆生是癰因噉食衆生是癰因噉食  
衆生是痛因噉食衆生是痔因噉食衆生是疽  
因噉食衆生是癰因噉食衆生是癰因噉食衆  
生是豈蚤因噉食衆生是致虱因噉食衆生是  
致蚊因噉食衆生是致蚤因噉食衆生是遭毒  
蟲因噉食衆生是遭惡獸因噉食衆生是病癰  
因噉食衆生是寒熱因噉食衆生是頭痛因噉  
食衆生是心痛因噉食衆生是腹痛因噉食衆

生是胸痛因噉食衆生是背痛因噉食衆生是  
手痛因噉食衆生是足痛因噉食衆生是髓痛  
因噉食衆生是腸痛因噉食衆生是筋縮因噉  
食衆生是胃反因噉食衆生是脈絕因噉食衆  
生是血流因噉食衆生是咽塞因噉食衆生是  
喉痛因噉食衆生是風病因噉食衆生是水病  
因噉食衆生是四大不調適因噉食衆生是五  
臟不調適因噉食衆生是六腑不調適因噉食  
衆生是癩因噉食衆生是狂因噉食衆生乃至

是四百四病一切衆病因噉食衆生是熱因噉  
食衆生是惱因噉食衆生是受壓因噉食衆生  
是遭水因噉食衆生是遭火因噉食衆生是遭  
風因噉食衆生是遭偷因噉食衆生是遭劫因  
噉食衆生是遭賊因噉食衆生是鞭因噉食衆  
生是杖因噉食衆生是笞因噉食衆生是督因  
噉食衆生是罵因噉食衆生是辱因噉食衆生  
是繫因噉食衆生是縛因噉食衆生是幽因噉  
食衆生是閉因噉食衆生是生苦因噉食衆生

是苦因噉食衆生是病苦因噉食衆生是灰  
苦因噉食衆生是怨憎會苦因噉食衆生是愛  
別離苦因噉食衆生是求不得苦因噉食衆生  
是五受陰苦因噉食衆生是行苦因噉食衆生  
是壞苦因噉食衆生是苦苦因噉食衆生是想  
地獄因噉食衆生是黑繩地獄因噉食衆生是  
衆合地獄因噉食衆生是叫喚地獄因噉食衆  
生是大叫喚地獄因噉食衆生是熱地獄因噉  
食衆生是太熱地獄因噉食衆生是阿鼻地獄

因噉食衆生是八寒八熱地獄因乃至是八萬  
四千鬲子地獄因乃至是不可說不可說鬲子  
地獄因噉食衆生乃至是一切餓鬼因噉食衆  
生乃至是一切畜生因當知餓鬼有無量苦當  
知畜生有無量苦畜生暫生暫死爲物所害生  
時有無量怖畏死時有無量怖畏此皆是殺業  
因緣受如是果若欲具列殺果展轉不窮盡大  
地草木亦不能容受向來所說雖復多途舉要  
爲言同一苦果但苦中自有輕重所以今日致

衆苦果皆由殺業惱害衆生略舉一隅粗言少  
分諸大德僧尼諸義學僧尼諸寺三官復當應  
思一大事若使噉食衆生父衆生亦報噉食其  
父若噉食衆生母衆生亦報噉食其母若噉食  
衆生子衆生亦報噉食其子如是怨對報相噉  
食歷劫長夜無有窮已如經說有一女人五百  
世害狼兒狼兒亦五百世害其子又有女人五  
百世斷鬼命根鬼亦五百世斷其命根如此皆  
是經說不可不信其餘相報推例可知諸大德

僧尼諸義學僧尼諸寺三官又有一大事當應  
信受從無始已來至於此生經歷六道備諸果  
報一切親緣遍一切處直以經生歷死神明隔  
障是諸眷屬不復相識今日衆生或經是父母  
或經是師長或經是兄弟或經是姊妹或經是  
兒孫或經是朋友而今日無有道眼不能分別  
還相噉食不自覺知噉食之時此物有靈卽生  
忿恨還成怨對向者至親還成至怨如是之事  
豈可不思暫爭舌端一時少味永與宿親長爲

怨對可爲痛心難以言說白衣居家未可適道  
出家學人被如來衣習菩薩行宜應深思諸大  
德僧尼諸義學僧尼諸寺三官又復當思一事  
凡噉食衆生是一切衆生惡知識是一切衆生  
怨家如是怨家遍滿六道若欲脩行皆爲障難  
一理中障難二事中障難何者是理中障難以  
業因緣自生障難令此行人愚癡無慧不知出  
惡無有方便設值善知識不能信受設復信受  
不能習行此是理中障難事中障者此諸怨對



或在惡鬼中或在毒獸中或在有大力神中或在大力龍中或在魔中或在天中如是處處來作留難設令脩行遇善知識深心信受適欲習行便復難起或引入邪道或惱令心亂脩戒脩定脩慧脩諸功德常不清淨常不滿足皆是舊怨起諸對障此是事中障難如是之事又宜深思但以一噉食衆生因緣能遠離一切佛法有如是種種過患貪毒亦如是瞋毒亦如是癡毒亦如是三毒等分皆同過患相與宜深自覺察

善思方便

斷酒肉文

弟子蕭衍又復敬白諸大德僧尼諸義學僧尼  
諸寺三官北山蔣帝猶且去殺若以不殺祈願  
輒得上教若以殺生祈願輒不得教想今日大  
衆已應聞知弟子已勒諸廟祝及以百姓凡諸  
群祀若有所報者皆不得薦生類各盡誠心止  
脩蔬供蔣帝今日行菩薩道諸出家人云何反  
食衆生行諸魔行一日北山爲蔣帝齋所以皆  
請菜食僧者正以幽靈悉能鑒見若不菜食僧

作菜食往將恐藉帝惡賤佛法怪望弟子是諸  
法師當見此意

斷酒肉文 三

弟子蕭衍又敬白大德僧尼諸義學者一切寺  
三官弟子蕭衍於十方一切諸佛前於十方一  
切尊法前於十方一切聖僧前與諸僧尼共伸  
約誓今日僧袈還寺已後各各檢勒使依佛教  
若復有飲酒噉肉不如法者弟子當依王法治  
問諸僧尼若披如來衣不行如來行是假名僧  
與盜賊不異如是行者猶是弟子國中編戶一  
民今日以王力足相治問若爲外司聽察所得

若爲寺家自相糺舉不問年時老少不問門徒  
多少弟子當令寺官集僧衆鳴犍槌捨戒還俗  
著在家服依涅槃經還俗策使唯窺老舊者窺  
多門徒者此二種人最宜先問何以故治一無  
行小僧不足以改革物心治如是一大僧足以  
驚動視聽推計名德大僧不應有此設令有此  
當依法治問其餘小僧故自忘言今日集會此  
是大事因緣非直一切諸佛在此非直一切尊  
法在此非直一切聖僧在此諸天亦應遍滿虛

空諸仙亦應遍滿虛空護世四王亦應在此金  
剛密迹大辯天神功德天神韋馱天神毗紐天  
神摩醯首羅散脂大將地神堅牢迦毗羅王孔  
雀王封頭王富尼跋陀羅伽王阿脩羅伽王摩  
尼跋陀羅伽王金毗羅王十方二十八部夜叉  
神王一切特呪神王六方大護都使安國如是  
一切有大神足力有大威德力如是一切善神  
遍滿虛空五方龍王娑竭龍王阿耨龍王難陀  
龍王跋難陀龍王伊那蒲龍王如是一切菩薩

龍王亦應遍滿在此天龍夜叉乾闥婆王阿脩羅王迦樓羅王緊那羅王摩睺羅伽王人非人等如是一切有大神是力有大威德力八部神王皆應在此今日土地山川房廟諸神亦應灰寒虛空如是幽顯莫不鑒觀唯無暇者可以戮人唯自淨者可以淨人弟子今日唱言此事僧尼必當有不平色設令剗心擲地以示僧尼丐數片肉無以取信古人有言非知之難其在行之弟子蕭衍雖在居家不持禁戒今日當先自



爲誓以明本心弟子蕭衍從今已去至於道場  
若飲酒放逸起諸姪欲欺誑妄語噉食衆生乃  
至飲於乳蜜及以酥酪願一切有大力鬼神先  
當苦治蕭衍身然後將付地獄閻羅王與種種  
苦乃至衆生皆成佛盡弟子蕭衍猶在阿鼻地  
獄中僧尼若有飲酒噉魚肉者而不悔過一切  
大力鬼神亦應如此治問增廣善衆清淨佛道  
若未爲幽司之所治問猶在世者弟子蕭衍當  
如法治問驅令還俗與居家衣隨時役使願令

目二部僧尼各還本寺匡正佛法和合時衆皆  
令聽經法者如說脩行不可復令斷大慈種便  
佛子不續若有犯法破戒者皆依僧制如法治  
問若有容受不相舉治者當反任罪又僧尼寺  
有事四天王迦毗羅神猶設鹿頭及羊肉等是  
事不可懸宜禁斷若不禁斷寺官任咎亦同前  
科別宣意

斷酒肉文 四

弟子蕭衍敬白諸大德僧尼諸義學僧尼諸寺  
三官向已粗陳魚肉障累招致苦果今重復欲  
通白一言闢浮提壽云百二十至於世間罕聞  
其人遷變零落亦無宿少經言以一念頃有六  
十剎那生老無常謝不移時暫有諸根俄然衰  
滅三途等苦倏忽便及欲離地獄其甚難戒  
德清淨猶懼不免況於毀犯安可免乎雖復長  
齋菜食不勤方便欲免苦報亦無是處何以故

爾此生雖可不犯衆罪後報業強現無方便三  
途等苦不能遮止况復飲酒噉食衆生諸僧尼  
必信佛語宜自力勵若云菜食爲難此是信心  
薄少若有信心宜應自強有決定心菜食何難  
菜蔬魚肉俱是一惑心若能安便是甘露上味  
心若不安便是臭穢下食所以涅槃經言受食  
之時令作子肉想如俱非惑豈須此法且置遠  
事止借近喻今已能蔬食者厭惡血腥其於不  
能蔬食者厭惡菜茹事等如此宜應自力廻不

善哉以爲善哉就善哉中重爲方便食菜子想  
以如是心便得決定凡不能離魚肉者皆云菜  
蔬冷令人虛乏魚肉溫於人補益作如是說皆  
是倒見今試復粗言其事不爾若久食菜人榮  
衛流通凡如此人法多患熱榮衛流通則能飲  
食以飲食故氣力充滿是則菜蔬不冷能有補  
益諸苦行人亦皆菜蔬多悉患熱類皆堅強神  
明清爽少於昏疲凡魚爲生類皆多冷血腥爲  
法增長百疾所以食魚肉者神明理當昏濁四

體法皆沈重無論方招後報有三途苦卽時四大交有不及此豈非惑者因心各有所執甘魚肉者便謂爲溫爲補此是倒見事不可信復有一種人食菜以爲冷便復解素此是行者未得菜意菜與魚肉如水與火食菜纔欲得力復噉魚肉魚肉腥臊能減菜力所以惑者云菜爲性冷凡數解素人進不得菜蔬之力退不得魚肉邪益法多羸冷少有堪能是諸僧尼復當知一事凡食魚肉是魔境界行於魔行心不決定多

有留難內外衆魔興相燒作所以行者思念魚  
肉酒是魔漿故不待言凡食魚肉嗜飲酒者善  
神遠離內無正氣如此等人法多衰惱復有一  
種人雖能菜食恃此憍慢多於瞋恚好生貪求  
如是之人亦墮魔界多於衰惱又有一種人外  
行似熱內心麤惡見人勝已常懷忿嫉所行不  
善皆悉覆相如是等人亦行魔界雖復菜蔬亦  
多衰惱若心力決正蔬食苦到如是等人多虧  
善力所扶法多堪能有不直者宜應思覺勿以

不決定心期決定人諸大德僧尼有行業已成  
者今日已去善相開導令未得者今去皆得若  
已習行願堅志力若未曾行願皆改革今日相  
與興爲菩提種子勿怪弟子蕭衍向來所白